

ODLUKA O VISINI KOMUNALNIH TAKSI NA PODRUČJU OPĆINE ILIJAŠ*

("Službene novine KS", broj 8/26)

I. OPĆE ODREDBE

Član 1.

(Predmet)

Ovom Odlukom propisuju se način utvrđivanja kriterija i visina komunalnih taksi (u daljem tekstu: taksa), vrsta, rokovi, način plaćanja i oslobođanje od plaćanja takse te otpis i povrat takse, na području Općine Ilijaš (u daljem tekstu: Općina).

Član 2.

(Definicije pojmova)

Definicije pojmova u smislu ove Odluke su:

a) Poslovni prostor u kojem se priređuju klasične igre na sreću i posebne igre na sreću podrazumijeva svaki poslovni prostor kojem se priređuju klasične igre na sreću i/ili posebne igre na sreću definisane odredbama Zakona o igrama na sreću ("Službene novine Federacije BiH", br. 48/15 i 60/15) i njegovim eventualnim izmjenama i dopunama,

b) Držanje i izvođenje muzike uživo u ugostiteljskim objektima podrazumijeva povremenu ili svakodnevnu organizaciju izvođenja muzičkog programa (muzike uživo) uz pružanje ugostiteljskih usluga;

c) Isticanje objava, oglasa i saopćenja na javnim mjestima podrazumijeva postavljanje stalnih ili privremenih objava, oglasa, i saopćenja na javnim mjestima u štampanoj ili elektronskoj formi (baneri, plakati, pano i sl.), što podrazumijeva i reklamiranje brendova, proizvoda ili usluga koje pružaju pravna ili fizička lica ili koje imaju svrhu putokaza prema mjestu sjedišta sponzora koji ih je postavio.

d) Korištenje prostora na javnim mjestima za kampove (šatore, prikolice i motorna vozila svih kategorija) podrazumijeva zauzimanje prostora za privremeni boravak od strane jedne ili više osoba;

e) Postavljanje uređaja za isplatu i naplatu gotovine (bankomata) podrazumijeva svako zauzimanje površine radi postavljanja i instaliranja ovakvih uređaja u svrhu pružanja usluga prema konzumentima;

f) Postavljanje svih drugih uređaja koji putem automatske obrade podataka naplaćuju usluge gotovinom, karticama za naplatu ili posredstvom telekom operatera (kafemati, parkomati i sl.) podrazumijeva postavljanje navedenih uređaja koji automatskom obradom podataka obračunavaju i naplaćuju razne vrste usluga bez osobnog posredovanja konzumenta sa pružaocem usluga, koji može biti registrovan kao fizičko ili pravno lice.

Član 3.

(Vrste taksi)

Takse se naplaćaju za:

a) Poslovni prostor u kojem se priređuju klasične igre na sreću i posebne igre na sreću koje su definisane odredbama Zakona o igrama na sreću ("Službene novine Federacije BiH", br. 48/15 i 60/15) i njegovim eventualnim izmjenama i dopunama;

b) Držanje i izvođenje muzike uživo u ugostiteljskim objektima;

c) Isticanje objava, oglasa i saopćenja na javnim mjestima;

d) Korištenje prostora na javnim mjestima za kampove (šatore, prikolice i motorna vozila svih kategorija);

e) Postavljanje uređaja za isplatu i naplatu gotovine (bankomata) i

f) Postavljanje svih drugih uređaja koji putem automatske obrade podataka naplaćuju usluge gotovinom, karticama za naplatu ili posredstvom telekom operatera (kafemati, parkomati i sl.).

Član 4.

(Obveznici plaćanja takse)

(1) Takseni obveznici su lica koja su korisnici prava na postavljanje, držanje i korištenje uređaja, predmeta i dr. ili prava na korištenje prostora na području Općine, a za čije postavljanje, držanje i korištenje je propisano plaćanje takse ovom Odlukom.

* Odluka je objavljena u "Službenim novinama KS", broj 8/26 od 26. februara 2026. godine, stupila je na snagu 26. februara 2026. godine. Odluka je donijeta na osnovu člana 6. Zakona o komunalnim taksama ("Službene novine Kantona Sarajevo", broj 8/22).

- (2) Ako za istu taksu postoje dva ili više obveznika, njihova obaveza je solidarna.
- (3) Taksena obaveza nastaje danom početka korištenja prava iz stava (1) ovog člana.

Član 5.

(Pripadnost i uplata takse)

- (1) Takse su prihod Općine.
- (2) Takse se uplaćuju na depozitni račun Općine otvoren kod poslovne banke.
- (3) U nalogu za plaćanje takse obavezno se upisuje poziv na broj 722321.

Član 6.

(Namjena prikupljenih sredstava)

Sredstva prikupljena po osnovu komunalnih taksi isključivo će se koristiti za izgradnju i održavanje urbanog mobilijara.

II. TARIFA KOMUNALNIH TAKSI

Član 7.

(Tarifni broj 1)

(1) Tarifnim brojem 1. utvrđuje se visina komunalne takse za poslovne prostore u kojima se priređuju klasične igre na sreću i posebne igre na sreću koje su definisane odredbama Zakona o igrama na sreću ("Službene novine Federacije BiH", br. 48/15 i 60/15) i njegovim eventualnim izmjenama i dopunama.

(2) Priređivač igara komunalnu taksu iz stava (1) ovog člana plaća jednom godišnje za svaki poslovni prostor u kojem se priređuju klasične igre na sreću i posebne igre na sreću u iznosu od 50.000,00 KM.

Član 8.

(Tarifni broj 2.)

(1) Tarifnim brojem 2. utvrđuje se visina komunalne takse za držanje i izvođenje muzike uživo u ugostiteljskim objektima.

(2) Komunalna taksa iz stava (1) ovog člana, plaća se dnevno u iznosu od 100,00 KM.

Član 9.

(Tarifni broj 3.)

(1) Tarifnim brojem 3. utvrđuje se visina komunalne takse za isticanje objava, oglasa i saopćenja na javnim mjestima određenim za te namjene.

(2) Za isticanje banera, plakata, oglasa i drugih sličnih saopćenja na javnim mjestima određenim za te namjene, plaća se jednokratna taksa u iznosu od 3,00 KM dnevno, srazmjerno broju dana isticanja istih, a što se utvrđuje na osnovu rješenja/ugovora kojim je odobreno njihovo isticanje.

(3) Za isticanje panoa, displeja i sl., plaća se godišnja komunalna taksa, u iznosu od 100,00 KM po 1,00 m², a što se utvrđuje na osnovu rješenja/ugovora kojim je odobreno njihovo isticanje.

Član 10.

(Tarifni broj 4.)

(1) Tarifnim brojem 4. utvrđuje se visina komunalne takse za korištenje prostora na javnim mjestima za kampove (šatore, prikolice, motorna vozila svih kategorija), deponije materijala i drugu privremenu upotrebu.

(2) Komunalna taksa iz stava (1) ovog člana, plaća se - dnevno za:

- a) svaki šator - 2,00 KM
- b) kamp prikolica - 1,00 KM
- c) motorna vozila svih kategorija - 1,00 KM.

Član 11.

(Tarifni broj 5.)

1) Tarifnim brojem 5. utvrđuje se visina komunalne takse za postavljanje uređaja za isplatu i naplatu gotovine (bankomata i sl.).

(2) Komunalna taksa iz stava (1) ovog člana, plaća se godišnje po jednom uređaju u iznosu od 500,00 KM.

Član 12.

(Tarifni broj 6.)

(1) Tarifnim brojem 6. utvrđuje se visina komunalne takse za postavljanje uređaja koji putem automatske obrade podataka naplaćuju usluge gotovinom, karticama za naplatu ili posredstvom telekom operatera (kafemati, parkomati i sl.).

(2) Komunalna taksa iz stava (1) ovog člana, plaća se godišnje po jednom uređaju u iznosu od 200,00 KM.

III. OSLOBAĐANJE OD PLAĆANJA I OTPIS TAKSE

Član 13.

(Oslobađanja od plaćanja takse)

Od plaćanja takse oslobođeni su:

- a) institucije Bosne i Hercegovine,
- b) organi, organizacije i javne ustanove Federacije Bosne i Hercegovine, Kantona i općine,
- c) humanitarne i dobrotvorne organizacije iz osnovne djelatnosti,
- d) udruženja koja ne obavljaju privrednu djelatnost,
- e) ratni vojni invalidi,
- f) lica kojima je rješenjem nadležnog organa priznato svojstvo člana porodice poginulih, umrlih, nestalih i zarobljenih boraca, ratnih vojnih invalida i civilne žrtve rata,
- g) privredna društva za zapošljavanje lica sa invaliditetom,
- h) javna preduzeća čiji je osnivač Općina.

Član 14.

(Zahtjev za oslobađanje takse)

Zahtjev za oslobađanje od plaćanja takse podnosi se Poreznoj upravi Federacije Bosne i Hercegovine - Kantonalni porezni ured Sarajevo - Porezna ispostava Ilijaš (u daljem tekstu: Porezna uprava).

Član 15.

(Otpis takse)

(1) U slučaju smrti taksenog obveznika fizičkog lica i trajnog prestanka obavljanja registrovane djelatnosti iza kojeg nije ostala pokretna i nepokretna imovina iz koje bi se mogla naplatiti taksa, Općinsko vijeće Ilijaš (u daljem tekstu: Općinsko vijeće) na prijedlog Općinskog načelnika Općine Ilijaš (u daljem tekstu: općinski načelnik) otpisuju taksu.

(2) Zahtjev za otpis takse Općini podnosi nasljednik taksenog obveznika.

IV. NAČIN PRIJAVE I NAPLATE TAKSE

Član 16.

(Prijava za razrez takse)

Takseni obveznici dužni su Poreznoj upravi podnijeti prijavu za razrez takse te istu platiti na način i u rokovima propisanim odredbama Zakona o komunalnim taksama ("Službene novine Kantona Sarajevo", broj 8/22).

Član 17.

(Provođenje postupka naplate takse)

Ukoliko takseni obveznik u propisanom roku ne uplati taksu, Porezna uprava će u skladu sa Zakonom o poreznoj upravi Federacije Bosne i Hercegovine ("Službene novine Federacije BiH", broj 33/02, 28/04, 57/09, 40/10, 27/12, 7/13, 71/14 i 91/15) po službenoj dužnosti provesti postupak naplate takse.

V. POVRAT TAKSE

Član 18.

(Povrat pogrešno ili više uplaćene takse)

(1) Obveznik od kojeg je taksa i kamata naplaćena, a koju nije bio dužan platiti ili je više uplatio, ima pravo na povrat.

(2) Zahtjev za povrat se podnosi Poreznoj upravi koja je nadležna za utvrđivanje takse.

(3) Porezna uprava je dužna da u roku od 20 (dvadeset) dana odluči o zahtjevu.

Član 19.

(Primjena drugih propisa)

U dijelu razreza takse, naplate, zastare, povrata, kamata i ostalih poslova vezanih za taksu koji nisu regulisani Zakonom o komunalnim taksama ("Službene novine Kantona Sarajevo", broj 8/22) i ovom Odlukom, primjenjivat će se odredbe Zakona o Poreznoj upravi Federacije Bosne i Hercegovine ("Službene novine Federacije BiH", br. 33/02, 28/04, 57/09, 40/10, 27/12, 7/13, 71/14 i 91/15 i 44/22) i Zakona o upravnom postupku ("Službene novine Federacije BiH", br. 2/98, 48/99 i 61/22).

VI. NADZOR I PROVOĐENJE

Član 20.

(Nadzor i kontrola)

(1) Nadzor i kontrolu prijava, obračuna i plaćanja komunalne takse vrši Porezna uprava u saradnji sa Službom za privredu i finansije.

(2) Služba za privredu i finansije Općine će vršiti redovne kontrole prijave taksenih obveznika i usklađenosti podataka sa Poreznom upravom, svaka u okviru svojih nadležnosti.

Član 21.

(Provođenje)

Za provođenje ove Odluke zadužuje se Porezna uprava.

VII. PRELAZNE I ZAVRŠNE ODREDBE

Član 22.

(Taksene obaveze do stupanja na snagu ove Odluke)

Taksene obaveze koje su nastale do dana stupanja na snagu ove Odluke, izvršit će se u skladu sa odredbama Odluke o visini komunalnih taksi na području Općine Ilijaš ("Službene novine Kantona Sarajevo", br. 13/22, 19/22, 50/22, 2/23, 1/24 i 4/25), koje su važile u momentu nastanka taksene obaveze, pod uslovom da iste nisu u suprotnosti sa odlukama Ustavnog suda Federacije Bosne i Hercegovine.

Član 23.

(Prestanak važenja ranijeg propisa)

Danom stupanja na snagu ove Odluke prestaje da važi Odluka o visini komunalnih taksi na području Općine Ilijaš ("Službene novine Kantona Sarajevo", br. 13/22, 19/22, 50/22, 2/23, 1/24 i 4/25).

Član 24.

(Stupanje na snagu)

Ova Odluka stupa na snagu danom objavljivanja u "Službenim novinama Kantona Sarajevo".